

Preparation--Kuyilama na Ntangu ya Mbote, Kukungu Ve

Baleso 2 ya Série “Kutunga Luzingu ya Mbote na Nzila ya Bible”,
Sous-série, “Luzingu ya mbote na mambu ya kisalu”

Bifu ya Mbote (français ‘trait de caractère’): Kuyilama na Ntangu ya Mbote (français : ‘préparer en avant’)

Kuyilama na ntangu ya mbote kele mambu mosi na bifu ya mbote. Kana muntu kele na bifu kuyilama na ntangu ya mbote, yandi me yilama kusimba konso occasio na mpila ya kulunga sambu yandi me sadila ntangu na yandi ti ngolo na yandi kuyilama na ntawala na mpila mosi ya mayele.

Contraire: Kukungu (français: procrastination)

Kukungu kele contraire ya kuyilama na ntangu ya mbote. Yo kele bifu ya mbi ya ke bwisa luzingu ya muntu. Kukungu kele kusadila ve ntangu ti ngolo ya muntu ntangu yai na mpila ya mbote. Ebuna muntu ya kinga, yandi ta vanda kuyilama ve kusimba baoccasio ya ta monika na nima. Kana muntu kinga konso ntangu, yandi ke yindula nde yandi ta sala na nima, kansi mbala mingi ya kuluta, yandi ta sala ve tii na nsuka. Yo yina, ntangu ya muntu mona occasio kukwenda na ntawala, yandi ta vanda ve ya kuyilama, ebuna yandi ta vanda ve na mpila ve kusimba yo.

Baverse ya Bible kulunguka kutuba sambu na baleso yai zole:

Bingana 6:6-8

6 Nge muntu ya bumolo, kwenda kutala baniama yai fourmi, ebuna nge baka mayele.

7 Yandi ke na mbuta ve, mfumu ve, ata muntu ya kuyala yandi ve,

8 kansi yandi ke bumbaka madia na yandi na mvula, ebuna na musibi yandi ke monaka mpasi ve.

Bankunga ya kwenda nzila mosi ti baleso yai:

BAFOURMI KELE NGANGU

Bafourmi kele ngangu

Bo ke na kapita ve

Kansi bo ke sosaka madia

Na ntangu ya mbote.

Ntangu musibi kwisa

Bo yonso dia mbote

Sambu bo mene yilama

Na ntangu ya mbote!

Baleso zole na sujet ‘Kuyilama na Ntangu ya Mbote :’

Leso 1 : Yozefi Twadisaka Ezipte Kuyilama sambu na Ntangu ya Nzala.

Kuyantika 41 :1-39 (Leso ya Kuwakana ya Ntama)

Leso 2 : Yesu Longaka Beto Kuyilama sambu na Kuvutuka na Yandi. Matayo 25 :1-13 (Leso ya Kuwakana ya Mpa)

Leso 1 :

Yozefi Twadisaka Ezipte Kuyilama sambu na Ntangu ya Nzala Kuyantika 41:1-39

Kikuma ya Leso:

Na nsuka ya lesu yai, bana ta bakisa nde Yandi zola bantu na Yandi kusadila ntangu ti ngolo na bo na mpila mosi ya mayele ntangu yai, sambu bo ta vanda ya kuyilama sambu na mambu ya fweti kwisa. Yo yina, bana ta yantika kusadila ntangu ti ngolo na bo na bampila ya kuluta mayele. Ebuna bo ta vanda ya kuyilama sambu na konso occasio ya Nzambi ta pesa bo.

Leso na Nkufi :

Nzambi pesaka Mfumu Farao bandosi sambu Farao lenda yilama sambu na mambu ta fweti kwisa. Nzambi songaka Yozefi nki bandosi yina zolaka kutuba na mpila nde yandi lenda sadisa bantu ya Ezipte kuyilama sambu bo zinga na ntangu ya mpasi. Sambu Yosefi yilamaka mbote, yandi zingaka, bantu ya Ezipte zingaka, ti bampangi na yandi mosi, bo zingaka mpi.

Aide Visuel:

Kana mpila ikele, sala nzungu ya masangu to manioko ya mobisu. Nzungu ya zole mpi kuvanda penepene.

Kuyantika:

Nge ta sala nki kana nge yindulaka kusala mambu mosi ya mbote, kansi nge monaka mpila ve ? Jana zolaka kulonga danse. Yandi zolaka kusadisa bantu ya nkaka kulonguka badanse ya kitoko traditionel ya tribu na yandi ti ya bwala na yandi. Yandi zolaka kusonika bahistoire nki mutindu makinu yina yantikaka ti disongidila na yo, na mpila nde yo kuvila ve. Jana zingaka na bwala mosi ya fioti. Yandi monaka mpila ve kufuta bantu sambu bo longaka yandi kukina mutindu yina. Fami na yandi vandaka bansukami. Yo yina, bo monaka ve mpila kusadisa yandi ata kukwenda na nzo-nkanda. Kansi Jana salaka ngolo kulungisa nzala na yandi ya kulonga danse. Yandi lombaka bantu ya nkaka na kati ya bwala kusadisa yandi to longuka badanse yonso ya bwala. Yandi lombaka bo kutala yandi kukina, kuzikisa nde yandi vandaka kusala yonso kaka mbote. Na nima, yandi lombaka longi mosi kusadisa yandi kulonguka kutanga ti kusonika. Yandi sosaka nde lumbu mosi, yandi mona mpila kusonika bahistoire ya badanse yina. Longi yina, yandi ndimaka ve kulonga Jana kaka ya mpamba. Jana ndimaka kusala na bilanga ya longi yina, sambu na kufuta yandi.

Transition na Leso ya Bible : Histoire ya Jana ke bambukisa mono histoire ya muntu mosi na kati ya Bible. Zina na yandi Yozefi. Beto tanga histoire na yandi na mukanda ya ntete ya Bible, mukanda ya Kuyantika, kapu 41.

Malongi ya Nene na Histoire ya Bible :

1.

1. Mfumu ya nene ya Ezipte lalaka bandosi bizare ya pesaka yandi mpasi. Yandi bingaka Yozefi sambu bantu songaka yandi nde Yozefi zabaka kutendula bandosi. (41:1-27). [Moniteur, sambu na histoire yai, badetail ya bandosi yina kele ve important. Yo yina, sommarizer partie yai na bandinga penepene na yai ya beto me tuba.]

Participation ya bana : Bana lenda sala bageste bonso bo kele kulala, bo ke mona bandosi ya mpasi.

2. Yozefi songaka mfumu ya nene nde Nzambi vandaka kupesa yandi bandosi yina sambu na kusonga yandi nki mambu fweti kwisila nsi na yandi, Ezipte. (41:25 & 28).

Participation ya bana: Bana yimba: Nzambi ke songa nge nki Yandi ta sala!

3. Nzambi vandaka kusonga mfumu ya Ezipte nde Yandi ta pesa bo bamvula 7 ya mbote, ya madia mingi. Kansi na nima, Yandi ta pesa bo bamvula 7 ya nzala, ntangu ya madia ta yela ve. (41:29-31).

Participation ya bana : Bana nangula misapi 7. Bo tuba nde, “Ntete bamvuls 7 ya mbote, na nima bamvula 7 ya nzala.”

4. Nzambi songaka mfumu bandosi zole kusonga yandi nde mambu yai fweti salama kaka sambu yo vandaka lukanu ya Nzambi, mpi kusonga yandi nde yo ta yantika nswalu. (41:32).

Participation ya bana : Bana nangula misapi zole. Bo tuba ti ritima: “**Ban-do-si zo-le ke son-ga n-de: Yo fwe-ti sa-la-ma. Ka-ka n-swa-lu !**”

5. Yozefi tubaka nde Nzambi vandaka kupesa bo bamvula 7 ya mbote sambu bo preparer--bo yilama mbote sambu na bamvula 7 ya nzala ya ta landa yo. Yandi songaka bo lukanu nki mutindu bo lenda yilama. (Bo tula muntu mosi responsable sambu na kubumba parti zole na kati ya kumi ya madia yonso na kati ya bamvula 7 ya mbote. (41:33-36)

Participation ya bana : Bana yimba, “Yilama na ntwala bamvula ya nzala kwisa. Mutindu kusala yo, yo yai, yo yai, yo yai.”

6. Mfumu ya nene zolaka ngindu yina. Yandi tulaka Yozefi yandi mosi responsable sambu na yo. (41:37-43)

Participation ya bana: Mwana mosi sala bonso yandi kele Yozefi. Bana ya nkaka songa yandi na musapi. Bo tuba nde: “Yozefi, NGE muntu fweti sadisa beto kuyilama!”

7. Yozefi bumbaka madia na bamvula 7 yonso ya mbote. (41:47-49)

(Moniteur, ntangu yai, songa dilonga ya bagrain ya masangu. Yai ke songa madia mingi ya yelaka na bamvula 7 yonso ya ntete. Bana ya nkaka lenda baka ndambu, bo bumba yo

na dilonga ya nkaka. Yai ke songa mpila Yozefi bumbaka madia na bamvula ya ya ntete.)

Participation ya bana :

Tanga baverse 47 tii na 49 mbote-mbote. Ebuna yula bana bakestio yai:

- Ntoto pesaka nki madia na bamvula 7 ya ntete? (Mingi)
- Yozefi bumbaka nki na bamvula yina? (Madia)
- Yandi bumbaka yo wapi? (Na bacité)
- Yandi bumbaka ikwa? (Kuluta mpila kutanga yo yonso.)

8. Nzambi sadilaka Yozefi sambu na kugulusa moyo ya bantu mingi na bamvula 7 ya nzala. (41:54).

[Moniteur, songa madia na dilonga ya zole. Songa bana nde bantu kufwaka ve, sambu bo me yilama na ntwala ya ntangu ya nzala.]

Participation ya bana: Kabisa bana na bandambu zole sambu bo sala mwa-seneti. Ndambu mosi dila nde bo kele nzala ti kima ya kudia ikele ve. Bo kele bantu ya bansi ya nkaka penepene. Ndambu ya zole pakula divumu na bo ti tuba nde, “Kansi na nsi ya Ezipte yonso, mampa kuvandaka.”

9. Nzambi sadilaa Yozefi ata kugulusa moyo ya fami na yandi mosi ntangu bo kwisaka na Ezipte kusosa madia. (45:4-7)

Participation ya bana: Bana yimba—« Yozefi yilamaka, yo yina yandi gulusaka bantu mingi.”

Bangiufula kusadisa bana kuyindula histoire yai ya Bible :

- Nzambi songaka Yozefi nde mpasi fweti kwisa. Nki mpasi yina?
(Ntangu ya nzala, ntangu ya bilanga ta yela ve, madia ta konda, ti bantu ta vanda na nzala.)
- Nki mutindu mfumu ya Ezipte zabaka nde ntangu ya mpasi yina fweti kwisa kaka ?
(Nzambi songaka yandi na ndosi ti pesaka bandosi zole kutuba nde yo fweti kuma.)
- Nki vandaka lukanu ya Yozefi sambu bo yilama na ntwala ntangu ya nzala kwisa ?

(Bo bumba zole ya kumi ya madia na kati ya bamvula ya mbote.)

- Nki bamvutu ya nkaka vandaka possible sambu na Yozefi?

(Yandi lendaka kutuba nde, ‘Yai luzolo ya Nzambi. Nge lenda sala kima ve.’ Yandi lendaka vanda makasi. Yandi lenda tuba nde ‘Mono ta kwikila kaka mambu ya mbote.’)

- Nsuka ya bapreparation ya Yozefi vandak nki? Nki salamaka sambu na mpila yandi yilamaka?

(Nzanbu gulusaka bantu mingi, fami na yandi mosi na kati.)

- Sambu na nki nge banza Nzambi pesaka mfumu ya Ezipte bandosi yina?

(Sambu bo vanda na mpila kuyilama to kusala preparation.)

- Nki mutindu Yozefi vandaka bonso fourmi?

(Bonso bafourmi ke sala, yandi yilamaka na ntangu ya mbote. Yo yina, ntangu ya mpasi fwaka bantu ve sambu bo vandaka ya kuyilama.)

Application sambu na bakristo:

Keti beno bambuka mpila Jana yilamaka sambu yandi kuma longi ya danse? (Yandi longukaka badanse ya bwala mbote, ti yandi longukaka kutanga ti kusonika, ata yandi monaka ve mpila kukwenda na nzo-nkanda.) Beno banza nde yandi ta sala nki na bamvula ke kwisa? (Yandi ta kuma longi ya danse, sambu yandi me yilama mbote.)

Nki mutindu nge lenda sadila ntangu na nge ti ngolo na nge sesepiyai sambu na kuyilama sambu na ntangu ke kwisa ? Na nzo-nkanda ? [Moniteur, bana lenda pesa bangindu na bo.] Nki mutindu nge lenda yilama sambu nge kuma papa to mama ya fami na ntangu ke kwisa ? Nki mutindu nge lenda yilama sambu nge kuma citoyen ya mbote ? Sambu nge kuzwa kusalu ya mbote ? Sambu nge kuma mukristo ya ngolo ?

Mposo yai, mono ke lomba beno kuyilama sambu na ntangu ke kwisa. Mono ke lomba beno kusala ngolo na nzo-nkanda konso lumbu sambu beno longuka mingi.

Invitation kubinga bavidu na Yesu :

Beto yonso ke na mfunu mpi kuzaba Nzambi, na mpila nde, na nima ya luzingu yai, beto lenda zinga ti Yandi mvu ya mvu. Nge lenda kwisa kuzaba Nzambi ntangu nge yamba Yesu Kristo bonso Mvulusi na nge.

Kana nge zola bika nzila ya masumu ti yamba Yandi, lomba mutindu yai na ntima na nge yonso:

Tata Nzambi, mono kwikila na ntima na mono yonso nde Nge tindaka Mwana na Nge Yesu Kristo kukuma Mvulusi na mono. Yesu, matondo na mpila Nge fwaka na zulu ya kulunsi sambu na kukatula masumu na mono. Matondo na mpila Nge telamaka na lufwa. Sesepiyai, mono lomba Nge kuvanda Mvulusi na mono. Kota na ntima ti na luzingu na mono. Twadisa mono na nzila na nge. Pesa mono ntima ya mpa sambu mono zola kulemfuka na nge, ti sambu mono mona kiadi konso ntangu mono sala masumu. Pesa mono moyo ya mpa na Nge. Matondo sambu Nge me gulusa mono sesepi yai. Na zina ya Yesu, Amen.

Leso ya Bible ya zole na Kuyilama—Yesu telaka kingana ya bana-bankento ya mayele ti ya buzoba. Matayo 25:1-13

Kikuma ya Leso: Na nsuka ya lesu yai, bana ta bakisa nde Nzambi zola bantu na Yandi kusadila ntangu ti ngolo na bo na mpila mosi ya mayele, na mpila nde bo vanda ya kuyilama sambu na mambu ya ke kwisa.

Bo ta bakisa mpi nde Yandi zola bantu yonso kuyilama sambu na kuvutuka ya Yesu. Beto samba nde bana ya zaba Yesu ve ta yamba Yandi bonso Mvulusi na bo, ti bo ta yantika kundima ti kubika masumu sambu bo vanda ya kuyilama ntangu Yesu ta kwisa kuvutuka.

Materials ya Mfunu:

Kana mpila ikele, nata bamwinda zole ya petrol. Fulusa mosi na petrol, kansi mwinda ya zole fweti vanda ya mpamba—petrol ve na kati, nsinga mpi kuvanda ve. Nata alumeti sambu na kutula tiya na mwinda na ntangu ya mbote na kati ya lesu.

Introduction--Kuyantika:

Histoire: Kwasi vandaka na kiese mingi. President zolaka kwisa kuvisite bwala na yandi. Bamposo mingi na ntwala, Kwasi sadisaka kukomba konso nzila, kulokuta konso kitini ya papier, kutula peinture ya mpa na banzo yonso, kukuna bafleur, ti kutula bamaba. Bwala fweti vanda kitoko mingi ntangu president ta kwisa.

Transition na Leso ya Bible: Kwasi zolaka mingi kuyilama sambu na kwisa ya president. Histoire na yandi bambukisa mono ya kingana mosi ya Yesu telaka. Yo kele kingana mosi ke tadila kuyilama. Beto lenda tanga yo na Mataya kapu 25.

Bangindu ya nene na lesu ya Bible:

[Moniteur, lesu yai kele nkufi. Beno lenda sala yo mbote na Etape-par-Etape Methode ya Kulonga ya beto ke songa awa.]

1. TANGILA BANA Matayo 25:1

1 Kimfumu ya Zulu, yo kele bonso bana-bankento kumi ya bakaka bamwinda na bo, ti bo kwendaka kutana ti bakala ya zolaka kukwela.

YULA BANA:

Bantu na kingana banani? (Bana-bankento kumi ti bakala ya zolaka kwela)
 Bana-bankento ke kwenda wapi? (Kutana ti bakala sambu na makwela na yandi_
 Bo fweti nata nki ti bo? (Bamwinda)

BANA SALA: Bana yonso nangula misapi kumi kusonga bana-bankento kumi. Na nima, bo sala geste bonso bo ke simba mwinda na ntwala na bo, bo ke kwenda kutana na bakala ya zola kwela.

YIMBA: Bana-bankento kumi bakaka bamwinda na bo, ebuna bo kwendaka na fete ya makwela.

2. TANGILA BANA Matayo 25:2-4

2 Tanu ya bana-bankento yina vandaka ya mayele, kansi tanu vandaka buzoba.

3 Bo ya vandaka buzoba, bo nataka bamwinda na bo, kansi bo nataka ve mafuta sambu na bamwinda.

4 Kansi bo ya vandaka ya mayele, bo bakaka mafuta na kati ya bamwinda na bo.

YULA BANA:

- Bandambu zole ya bana-bankento vandaka nki? (Ya mayele ti ya buzoba)
- Ikwa vandaka ya mayele, ti ikwa vandaka ya buzoba? (Tanu ya mayele ti tanu ya buzoba)
- Bo ya buzoba, bo salaka nki erere? (Bo nataka ve mafuta sambu na bamwinda na bo. Bo yilamaka ve kusadila bamwinda yina.)
- Nki beno banza? Bamwinda pelaka kukonda mafuta? (Ikele ve. Bamwinda kukonda mafuta vandaka ya mpamba.)

[Moniteur, ntangu yai, kana nge me nata bamwinda zole, mosi ti mafuta ti mosi kukonda mafuta, tula tiya na mwinda ya kele na mafuta na kati. Songa bana nde nge me yilama na ntwala. Nge me tula mafuta dezia. Bana bula maboko ntangu yo yantika kupela.

Na nima, meka kutula yina tiya ya kele na mafuta ve. Yo ta pela ve sambu nge me tula ve mafuta na kati.]

- Nki songaka mayele ya ndambu ya bankento? (Bo nataka mafuta sambu na bamwinda na bo.)
- Nki songaka buzoba ya ndambu ya bankento? (Bo nataka ve mafuta sambu na bamwinda na bo, ti bamwinda yina lendaka kusala ve kukonda mafuta.)

BANA SALA: Bana nangula misapi tanu sambu na kusonga bana-bankento tanu ya mayele. Bo sala bageste bonso bo ke tula mafuta na kati ya bamwinda na bo.

Na nima, bo nangula misapi tanu sambu na kusonga bana-bankento ya buzoba. Bo sala bonso bo me lembe, ti bo tuba nde, "Mambu ve. Beto ta tula mafuta na nima."

YIMBA: Bana-bankento tanu tulaka mafuta na kati ya bamwinda na bo. Bo mayele, mayele, mayele.

Bana-bankento tanu tulaka ve mafuta. Bo kusininaka. Bo buzoba, buzoba, buzoba!

3. TANGILA BANA Matayo 25:5

5 Ebuna ntangu bakala ya makwela kwisaka ve nswalu, mpongi simbaka bo yonso.

YULA BANA:

Nki mambu salamaka na bakala ya makwela? (Yandi kwisaka ve nswalu.)

Bana-bankento yonso yantikaka kusala nki? (Kulala mpongi.)

BANA SALA: Bana sala geste bonso bo ke lala mpongi.

YIMBA: Bakala kwisaka nswalu ve. Bo yonso lalaka mpongi.

4. TANGILA BANA Matayo 25:6

6 Ebuna na midi na mpimpa, bo waka ndinga, “Atasio! Bakala ya makwela ke kwisa. Beto kwenda kutana ti yandi!”

YULA BANA:

Na midi na mpimpa, nki salamaka ? (Bo waka ndinga ke dila nde bakala ya makwela ke kwisa.)

Bo fweti sala nki ntangu yina ? (Kwenda kutana ti yandi)

Sambu na nki bo vandaka na mfunu ya bamwinda? (Ntangu me luta. Mpimpa me bwa.)

BANA SALA: Bana boka na nding ya ngolo:

Ntangu me lunga! Beto kwenda!

BANA YIMBA: Na midi na mpimpa, ntangu me lunga. Beto kwenda, beto kwenda.

5. TANGILA BANA Matayo 25:7-9

7 Ntangu yina, bana-bankento telamaka. Bo yidikaka bamwinda na bo.

8 Ebuna bana-bankento ya buzoba tubilaka bana-bankento ya mayele nde, “Pesa beto ndambu ya mafuta na beno, sambu bamwinda na beto zola kufwa.”

9 Kansi bo ya mayele vutulaka nde, « Mpila ve. Beto kele ve na mafuta ya kulunga bamwinda na beto ti ya beno mpi. Beno kwenda kusumba mafuta, beno mosi.”

YULA BANA:

Bana-bankento salaka nki ntangu bo waka nde bakala ya makwela vandaka kukwisa? (Bo telamaka, bo yidikaka bamwinda na bo sambu na kukwenda.)

Bana-bankento ya buzoba lombaka bo ya mayele kusala nki? (Kupesa bo mafuta.)

Sambu na nki bo lombaka mpidina? (Sambu bamwinda na bo zolaka ve kupela, sambu bo yilamaka ve na mafuta.)

Bana-bankento ya mayele vutulaka bo nki mvutu? (Mpila ve. Mafuta na beto ta lunga ve bamwinda zole.)

Ntangu me lunga kukwenda na makwela. Kansi bo ya buzoba, bo vandaka kusala nki ntangu yina? (Kukwenda kusosa mafuta ya kusumba.)

BANA SALA: Ndambu ya bana sala bonso bo ya buzoba. Bo kwenda na muntu na muntu kulomba kaka mafuta. Ndambu ya bana sala bonso bo ya mayele. Bo vutula nde, “Pardo, mafuta na mono ta lunga ve beto zole.”

YIMBA: O lumbu ya kiese na bantu ya me yilama.

O lumbu ya mawa ya bantu ya me yilama ve. Mafuta, bo ta mona yo wapi na midi na mpimpa?

6. TANGILA BANA Matayo 25:10

10 Ebuna, bu bo ya buzoba me kwenda kusumba mafuta, bakala ya makwela kwisaka. Bo ya me yilama kwendaka na yandi na fete ya makwela, ti bo kangaka kielo.

YULA BANA:

Nki salamaka ntangu bazoba vandaka kusosa mafuta? (Bakala ya makwela kwisaka.)

Nani kwendaka ti yandi na fete ya makwela? (Bo ya vandaka ya kuyilama.)

Na nima bantu kotaka na fete, nkwa-fete salaka nki? (Yandi kangaka kielo.)

BANA SALA: Mwana-bakala mosi sala bonso muntu ya makwela. Bany ya nkaka landa yandi, bo kina na kiese na ndonga.

YIMBA: Bo ya me yilama kwendaka na makwela. O yea! O yea!

7. TANGILA BANA Matayo 25:11-12

11 Na nima, bana-bankento ya buzoba kwisaka mpi. Bo nde, “Mfumu! Mfumu! Kangula, beto kota.

12 Kansi yandi vutulaka bo nde, “Kieleka, mono ke songa beno, mono zaba beno ve!”

YULA BANA:

Bazoba kumaka na fete ya makwela na nki ntangu? (Na retard)

Bo zolaka nkwa-fete kusala bo nki? (Kukangula bo.)

Keti yandi ndimaka? (Ikele ve. Yandi tubaka nde yandi zabaka bo ve.)

BANA SALA: Ndambu ya bana bula na kielo, kuboka nde, “Kangula beto!” Ndambu ya nkaka seka na kati ya fete ti kina na kiese.

YIMBA: Bazoba bulaka na kielo ngolo, kansi kielo kangulaka ve.

8. TANGILA BANA Matayo 25:13

13 “Yo yina, tala, sambu beno zaba ve kilumbu to ntangu ya Mwana-Muntu ta kwisa.”

YULA BANA:

Yesu ke longa beto nki na kingana yai? (Beto vanda ya kuyilama sambu na kukwisa na Yandi.)

Sambu na nki beto ke na mfunu ya kuyilama? (Sambu beto zaba ve lumbu to ntangu ya Yesu ta vutuka.)

BANA SALA: Bana yonso tala na zulu. Bo boka nde, "Yilama! Yesu ta vutuka!"

YIMBA: Yimba nkunga, YESU KRISTO, MFUMU NA BETO, TA KWISA DIAKA.

Application/Devoir sambu na bakristo:

Mwana-mukristo, kana nge zaba Yesu, nge ta kwenda ti Yandi ntangu Yandi ta kwisa. Kansi, mbala ya nkaka nge ta mona nsoni ntangu Yandi kwisa. Mbala ya nkaka moyo na nge ta vanda ya kufuluka na masumu. Kana nge zaba Yesu, nge lenda lomb'a Nzambi kusadisa nge kubuya masumu. Kana nge kubwa ti sala disumu mosi, kaka na ntangu ya nge bakisa yo, nge lenda lomb'a Nzambi kulolula nge. Yandi ta sukula ntima na nge ti pesa nge ngolo sambu nge kubwa diaka ve. Ntantu Yandi kwisa, nge ta mona nsoni ve.

Mposo yai, keti nge ta lomb'a ndolula na Nzambi nswalu kana nge me bakisa nde nge me sala mbi ?

Invitation/Kubinga bavidi kukwisa na Yesu:

Mbala ya nkaka nge kele bonsa bana-bankento ya buzoba. Nge me yilama ve kutana ti Yesu, sambu nge me yamba Yandi ntete ve bonso Mvulusi. Mbala ya nkaka nge me vanda kuyindula yo. Bubuyai ntangu ya mbote kundima nde, "Ee, Yesu, mono ta yamba Nge." Bambuka, bazoba vandaka ve ya kuyilama sambu na fete ya makwela sambu bo vandaka kusukinina. Ntantu nkwa-makwela kwisaka, ntangu me luta. Kielo vandaka kukanga. Mbala ya nkaka nge me yindula nde "Lumba mosi, mono ta ndiama Yesu. Ntangu mono me yela, mono ta ndima Yandi. Kusukunina diaka ve. O, kutuba « Ee! » na Yandi bubuyai. Ntangu nge ndima Yandi na ntima na nge yonso, Yandi ta kota.

Kana nge me yamba Yesu ntete ve, kansi nge zola kusala yo sesepiyai, nge lenda samba sesepiya, bonso yai :

Yesu, mono ke sukinina diaka ve. Mono zenga sambu na Nge sesepiyai. Mono tuba « Ee » na Nge, na ntima na mono yonso sesepi yai. Ee, Mono kwikila nde Nge kele Mwana ya Nzambi. Ee, Mono kwikila Nge fwaka sambu na kufuta mfuka ya masumu yonso na mono. Ee, Mono kwikila Nge telamaka na lufwa, Ee, Mono kwikila nde Nge tombukaka diaka na zulu. Ee, Mono kwikila Nge ta kwisa diaka. Ee, mono zola bika nzila ya masumu. Ee, mono baka Nge kuvanda Mvulusi na mono. Ee, mono tula kivuvu na Nge mosi, na Nge kaka. Merci sambu Nge me gulusa mono sesepi. Na zina ya Yesu, Amen.

NSUKA YA LESO 2